

Ruthy "Lady Ruth" Vrieswijk-Bergen

Sabiduria den nos alegria



YA nos a despedi di dje y bisa ayo y te despues na nos bon amigo locutor profesional cu curason grandi. E ta den mi curason ainda, e bunita atardi ey cu speechnan bunita di e.o. Erin Croes di Magic FM, Pastoor Marcel Balootje, Victor Pieter y Mimi Koolman y boso amiga y sirbidora Ruthy "Lady Ruth" a recita un bunita poema prosa na comienso di e atardi tristo aki, pero acepta pa tur, pasobra Dios ta duna, Dios ta tuma. Hopi colega den e mundo di radiodifusion a bin despedi di Johnny Habibe, the Anchorman di Mega 88 y Hit 94 FM. Aruba a perde un di e miho bosnan na radio. Awo su yiunan ta haciendo tur lo posibel pa sigui den e pasonan exitoso di nan tata den e ramo aki di radiodifusion. Un reto grandi sigur, pero no imposibel cu e curason n'e bon luga.

Nos a sigui nos curason pa comparti e poema prosa den nos relato di awe. Mientras hopi ya ta den e dushi ambiente di carnaval su actividadnan, tin famia tristo cu perdida di un ser keri. Nos condolencia, consuelo y amor na tur e famianan aki. Palabranan hopi uza di e poeta Lady Ruth ta, cu nos tur tin cu bay un dia...

Mientras nos ta aki na mundo rondona p'e fisico y material, nos lo sigui haci nos best den tur cos dia pa dia, segun e boluntad di nos Creador di amor. Ata aki e poema prosa dedica na feliz memoria di mi gran amigo locutor y presentador John Alex "Johnny" Habibe RIP.

Danki p'e atencion di curason na nos relato di awe. Un bon dia yen di sabiduria den nos alegria.

JOHNNY CU FE DEN SU BUNITA CURASON

Aruba den shock cu cambio di aña 2024 pa 2025

Wowonan a lesa riba Facebook. Curason y alma cu tristesa di warwaru



No por a yora, silencio cu hopi pregunta sin contesta. Un smile, Johnny a biba bon na paz cu tur. A bay nos dilanti un krenchi trempan. Aya riba lo sigui cu mas bunita y bon trabao.

Bon amigo, colega locutor, colega den medio di comunicacion Doño y director exitoso di Mega 88 y Hit 94 FM. Su team di locutor y presentador, Julissa su man drechi den oficina. Patrocinado y comerciantenan, fiel oyentenan den tur skina. Su noticiero y programa Johnny's Goldies bon scucha

Johnny su curason n'e bon luga. Yen di fe y gradicimento pa su Yaweh Un mente, alma y curason bunita di un genio a uni nos awe.

John Alex Habibe cu estudio, curso, trabao y logro incomparable. Guapo, unico y profesional hopi sabi a siña su mes tur cos den e mundo di radiodifusion. Nos a lesa di esakinan, skirbi pa Roberto G. Croes, den "Nos historia Nos herencia". Nos a tende di esakinan den e programa Voices and Choices cu Marisol Tromp.

A Nos a combersa cu Johnny regularmente den dushi ambiente di paz Ora nos bishit'e pa papia di cos social cultural den su noticiero. A comparti di curason pa curason, di nos fe, di nos amor pa Creador di Universo. Su bos fuerte caluroso y unico lo keda graba den nos cu su mirada profundo. Su seriedad y su chistenan, su elogionan, respet y aprecio cu el a merece aki na mundo. No ta iguala locual ta sper'e ayanan den Reino Celestial. Un cabayero, un bon hende, un dushi hende a bay laga nos. Awo, uni den e eterno amor, splendor y luz di Dios

E ser humano precioso den Johnny a inspira nos tur. Como hende, tambe a faya aki aya y por a haci algun cos diferente. Pero a sigui stima tur su sernan keri y tabata orguyoso di nan y di tur fiel oyente. Cu respet y amor di YAWEH pa tur prohimo ruman. Johnny su fe fuerte y fiel den su respet y amor pa YAWEH, grandi y ehemplar. Sigui bo rumbo, lieve Johnny, memey di e streanan como un strea cu tono celestial. Johnny Habibe, The Anchorman, cu bunita aprecio di amistad pa Ruthy Bergen Vrieswijk. Un amistad sincero y directo den luz infinito, di alma pa alma, hopi special.

Danki pa tur locual bo a haci pa alegra nos curason cu bo talentonan duna na Aruba, awo den tur libertad den Cas Musical Celestial di bo YAWEH sin duda